



Foto: Avaz

Foto: Damir ČUMUROVIĆ i Amer KAJMOVIĆ

**LUTKA 2** Zbog ometanja rada pravosuđa

# UHAPŠEN FAHRUDIN RADONČIĆ

- Duge cijevi u redakciji Avaza
- **SBB:** Neprijmjerena demonstracija sile
- SIPA dala zeleno svjetlo za imenovanje Bakira Dautbašića

# Zbog ometanja rada pravosuđa UHAPŠEN FAHR UDIN RADONČIĆ

● Pretreseni Radončićeva vikendica, spratovi Avaz Twist Towera i stan u sarajevskom Importanne centru ● **SIPA** dala zeleno svjetlo za imenovanje Bakira Dautbašića

Postupajući po nalogu Tužilaštva BiH, policijski djelatnici Državne agencije za istrage i zaštitu (**SIPA**) uhapsili su jučer na području Hadžića, u operativnoj akciji Lučka2, lidera SBB-a, državnog delegata i osnivača Dnevnog avaza Fahrudina Radončića. Kako su saopćili iz Tužilaštva, Radončić je osumnjičen za kazneno djelo ometanja rada pravosuđa (članak 241. KZBiH), odnosno pritiska na svjedoke.

## Prijetnje i pritisci

Pripadnici **SIPA** su tokom juče-rašnjeg dana pretresli nekoliko lokacija s ciljem pronalaska i privremenog oduzimanja predmeta koji mogu poslužiti kao dokaz u daljem postupku. Pretreseni su Radončićeva vikendica, Avaz Twist Tower, kao i njegov stan u sarajevskom Importanne centru. Pripadnici **SIPA** su iz zgrade Avaza, između ostalog, izuzeli nekoliko računara.

Vasvija Vidović i Dragan Barbarić, koji će pravno zastupati Radončića, potvrdili su sinoć medijima da pretresi nisu završeni. Barbarić je kazao da će Radončić danas, do 14.30 sati biti u prostorijama **SIPA** gdje će biti ispitan, te će biti predat Tužilaštvu BiH. Ta-

kođer je rekao da je "vidljivo da se radi o politici, te da nema dodirne veze s pravom".

Iz **SIPA** su saopćili da predmet pretresa nije bio medij, nego isključivo prostorije koje koristi osumnjičeni Radončić, a koje se nalaze u istom objektu, međutim iz Redakcije Dnevnog avaza su medijima poslale i fotografije koje svjedoče o prisustvu specijalaca u službenim prostorijama novine.

Podsjećanja radi, u okviru iste akcije 11. januara uhapšeni su visokopozicionirani kadrovi SBB-a Bakir Dautbašić i Bilsena Šahman, koji se nalaze u jednomjesečnom pritvoru. I njih dvoje uhapšeni su zbog utjecaja na svjedoke, što je u sudnici objasnio postupajući tužitelj, inače šef Posebnog odjela za organizirani kriminal, privredni kriminal i korupciju Tužiteljstva BiH Božo Mihajlović. On je u svom izlaganju naveo da su osumnjičeni prijetili i vršili druge pritiske na Azru Sarić, svjedokinju u procesu koji se na Kosovu vodi protiv Nasera Keljmenđija.

Keljmenđi, kojeg su SAD svojevrmeno stavile na crnu listu kao vodećeg evropskog narkobosa, u Prištini je optužen za čitav niz krivičnih djela, među kojima je i ubistvo Ra-

miza Delalića Čele. Sarić je trebala svjedočiti u ovom procesu, no izjavila je da se na nju vrše pritisci.

- Azra Sarić u iskazu potvrđuje da se po pozivu Bakira Dautbašića dogovorila da održe sastanak u restoranu na Grbavici. Onda je osumnjičeni Dautbašić, putem osumnjičene Bilsene Šahman, naknadno odlučio da taj sastanak zbog tajnosti bude održan u stanu Bilsene Šahman u Sarajevu. Prilikom ovog sastanka, Šahman i Dautbašić su zatražili od svjedokinje da u svom svjedočenju na Sudu BiH provodom predmeta protiv Nasera Keljmenđija zaštititi njihovog šefa Fahrudina Radončića. Dana 17. decembra u 17.20 sati osumnjičena Šahman ponovo poziva svjedokinju Azru Sarić, obavještava je da se vraća sa puta iz Banje Luke za Sarajevo, što je potvrđeno i baznim stanicama telefona osumnjičene Bilsene Šahman, te da će se sastati pred hotelom Park u Vogošći. Tu su se sastale i razgovarale u putničkom vozilu koji koristi Bilsena Šahman. Tom prilikom, Šahman je Sarić saopćila da je njen šef Fahrudin Radončić zatražio da u svjedočenju zaštititi ne samo nje-ga već i Nasera Keljmenđija, kazao je državni tužilac Mihajlović

na ročištu za određivanje pritvora Dautbašiću i Šahman.

Tužilac Mihajlović je također ustvrdio da je Fahrudin Radončić obećao Dautbašiću i Šahman da će preko šefa misije OSCE-a u BiH Jonathana Moorea intervenirati kako bi istraga u Tužilaštvu BiH bila zaustavljena.

Istoga dana kada je uhapšen, Bakir Dautbašić je ispred SBB-a i zvanično kandidiran za državnog ministra prometa i komunikacija.

### Jednomjesečni pritvor

Državna agencija za istrage i zaštitu (SIPA) završila je jučer provjere predloženih SBB-ovih kandidata za ministra prometa i komunikacija - Dautbašića i zamjenika ministra odbrane Seada Jusića u Vijeću ministara BiH, potvrdila istinitost podataka koje su kandidati naveli u svojim izjavama, te je na taj način dala zeleno svjetlo za imenovanje Dautbašića i Jusića, potvrđeno je za Oslobođenje u Vijeću ministara.

Iako se sekretar Ministarstva sigurnosti BiH Dautbašić, kojeg je ministar sigurnosti Dragan Mektić u međuvremenu suspendirao, nalazi u jednomjesečnom pritvoru koji, prema rješenju Suda BiH može trajati do 11. februara ili do nove odluke Suda, predsjedavajuća Predstavničkog doma

Parlamenta BiH Borjana Krišto (HDZBiH) kazala je jučer za Oslobođenje, prije nego što je SIPA poslala obavijest o okončanju provjera, kako nije nemoguće da na sjednici ovog doma 3. februara jedna od tačaka dnevnog reda bude i imenovanje članova Vijeća ministara, Bakira Dautbašića za ministra prometa i komunikacija i Seada Jusića za zamjenika ministrice odbrane.


- To je moguće ukoliko Državna agencija za istrage i zaštitu do tada završi sa svojim provjerama i ako se sastanu članovi Komisije za pripremu izbora Vijeća ministara

BiH. Ako oni odrade svoj posao, imenovanja će se naći na dnevnom redu sjednice, kazala nam je Krišto.

Član Komisije za pripremu Vijeća ministara Jasmin Emrić (ASDA) kazao je kako nije nigdje izričito navedeno da kandidat za člana Vijeća ministara mora biti fizički prisutan na sjednici prilikom imenovanja "iako bi to bilo logično".


- Međutim, kandidat mora biti prisutan na intervjuu kako bi mu članovi Komisije eventualno postavili određena pitanja, kazao je Emrić.

**A. GRABOVAC**



Pokušaj zastrašivanja

Foto: Avaz



Pripadnici SIPA ispred Avaz Twist Towera

Foto: D. ČUMUROVIĆ

## Duge cijevi u redakciji

Nakon hapšenja Fahrudina Radončića, saopćenjem za javnost oglasio se urednički kolegij Dnevnog avaza povodom ulaska službenika **SIPA** jučer nešto prije 15 sati u prostorije redakcije.

- Riječ je o brutalnom pritisku na slobodu medija i pokušaju zastrašivanja, s obzirom na to da su u redakciji Dnevnog avaza, pored inspektora, upad izvršili specijalci **SIPA**, naoružani dugim cijevima. Za ovakvu demonstraciju sile nad našim novinarima i urednicima nije bilo potrebe, jer su Dnevni avaz i njegov izdavač Avaz-roto press poznati po visokoprofesionalnom i transparentnom radu, bez ijedne mrlje u 20-godišnjoj povijesti. S tim u vezi, istražitelji **SIPA**, kao i u nekim ranijim slučajevima, na vrijeme su imali priliku dobiti od nas sva potrebna saznanja, te nije bilo potrebe za bilo kakvim prepadima, navodi se, između ostalog, u saopćenju.

Upravni odbor Udruženja BH novinari uputio je javni protest Tužiteljstvu BiH i **SIPA** zbog upada maskiranih pripadnika ove agencije s dugim cijevima u redakciju Dnevnog avaza, te zastrašivanja i ispitivanja novinara i urednika ovog dnevnog lista. UO BH novinara, kako su istakli, podržava aktivnosti pravosudnih institucija i sigurnosnih agencija, usmjerenih ka otkrivanju kriminalnih djela i hapšenju osoba koje su prekršile zakon.

Vijeće za štampu oglasilo se osuđujući brutalni upad naoružanih i maskiranih pripadnika **SIPA** u redakciju lista Dnevni avaz. Upravni odbor Vijeća za štampu ističe da pozitivne istražne radnje Agencije i Tužilaštva, u cilju otkrivanja i sprečavanja kriminalnih radnji i djela određenih osoba, ne mogu biti opravdanje za slanje policajac naoružanih dugim cijevima u redakciju medija, ispitivanje novinara i onemogućavanje njihovog slobodnog rada.

## SBB: Neprimjerena demonstracija sile

“Savez za bolju budućnost BiH najoštrije osuđuje besprizornu zloupotrebu pravne države od pojedinaca iz pravosudne mafije. Privođenje predsjednika SBB-a Fahrudina Radončića je krajnje neprimjerena demonstracija sile i dosad nezabilježenog načina pokušaja eliminacije političkih protivnika od porodično-kriminalnih klanova i odmetnutih centara moći”, iznio je na jučer održanoj konferenciji za novinare Mirsad Đonlagić, potpredsjednik SBB-a, stav ove stranke nakon hapšenja predsjednika stranke Fahrudina Radončića.

On je istakao kako je SBB potpuno uvjeren da je “Fahrudin Radončić apsolutno nevin, te da je riječ o besprizornoj političkoj montaži koja za cilj ima destabilizaciju bošnjačkog političkog faktora, a time i destabilizaciju BiH”.

“Indikativno je da u vrijeme kada svjedočimo stabilizaciji prilika u Federaciji i BiH u cjelini, kada je nova ko-



**Donlagić:** Brutalna zloupotreba institucija

alicija počela otvarati evropsku perspektivu BiH i kreirati ambijent za prosperitetniju budućnost svih građana, na sceni imamo brutalnu zloupotrebu institucija i poluga pravosudnog sistema. SBB ima puno povjerenje u sposobnost pravne države i vjeruje u poštenje i profesionalizam časnih ljudi u Tužilaštvu i pravosuđu BiH, te ćemo iskoristiti sve demokratske instrumente i mehanizme političke borbe da razobličimo podlu montažu i demaskiramo divljanje kriminalnih elemenata

u pravosudnim i porodično-kriminalnim strukturama u BiH”, naglasio je Đonlagić.

Dodao je kako su u SBB-u “sigurni da će ovaj sramni čin pravosudnih institucija BiH u konačnici dovesti do razobličavanja i demontaže kriminalnog miljea oličenog u vezama teško presuđenih kriminalaca i odmetnutih struktura u Sudu i Tužilaštvu BiH”. Iz SBB-a su apelovali na članstvo da ne poduzima nikakve ishitrene i pojedinačne aktivnosti.

**A. Pe.**

## Čović: To je tako

- Teško mi je to komentirati. Ja sam siguran da će se gospodin Radončić, kolega Radončić, prijatelj Fahro Radončić, znati iznijeti sa ovim iskušenjem. Ono što sam razumio, a sve što znam je iz medija, da je razlog privođenja ometanje istrage ili pravosudnih aktivnosti, odnosno određeni procesi u svjedočenju. Nedavno smo pričali, pet-šest predsjednika stranaka je bilo tu. Tada nam je gospodin Radončić naznačio ovakve mogućnosti. To je tako, zaključio je Čović.

**M. Da.**

## Berisha: Radončić je samo svjedok

Hapšenje Fahrudina Radončića nema nikakve veze sa slučajem Nasera Keljmenđija, izjavio je za Anadoliju Besnik Berisha, advokat odbrane Nasera Keljmenđija. Berisha ocjenjuje da Radončić nije imao nikakvog razloga da ometa istragu u slučaju Keljmenđija, jer je bio samo svjedok. "Radi se više o političkom hapšenju, nego na osnovu pravnih činjenica i nema nikakve logike da on ometa slučaj u kome nije okrivljeni, već ima status svjedoka", istakao je advokat Berisha.

## Osmanović i Čavara: Sačekajmo novi dan

"Na sam čin hapšenja nemam nikakav komentar. Mogu reći samo da u pravnoj državi odgovaraju i oni koji krše zakon u izvršavanju, kao i oni koji krše zakon u neizvršavanju svojih obaveza iz domena svoje nadležnosti. Prema tome, vrijeme će pokazati šta je tu posrijedi, ali zakoni ove države se moraju poštivati sa svih strana. Očekujem da ovdje bude urađeno sve u skladu sa zakonom i Ustavom ove države, kazao nam je Ismet Osmanović, predsjednik Kluba poslanika SDA u Parlamentu FBiH i jedini visoki dužnosnik SDA koji je jučer bio dostupan novinarima.

Upitan da li se ovakva situacija može reflektovati na odnose među koalicionim partnerima, Osmanović kaže da "gledano iz političkog diskursa, sigurno da će ovo imati implikacije i da će imati uticaj i na same odnose". Na pitanje koliko hapšenje lidera SBB-a može uticati na koaliciju ove stranke sa SDA i HDZ-om BiH, predsjednik Federacije i potpredsjednik HDZ-a Marinko Čavara kaže za Oslobodjenje kako je "jako teško komentirati nešto bez relevantnih informacija".

- Uhićenje jednog od predsjednika stranaka može izazvati probleme unutar koalicije, ali vidjet ćemo šta će nam donijeti naredni dan. Problemi mogu nastati u smislu provođenja svega dogovorenog, ali vidjet ćemo šta će se događati, poručio je Čavara.

**E. B.**